

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-547/08
Sarajevo, 29.04.2008. godine

Z A P I S N I K
7. VANREDNE SJEDNICE DOMA NARODA PARLAMENTA FEDERACIJE
BOSNE I HERCEGOVINE, održane 29. aprila 2008. godine

Sjednica je počela u 13.40.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio delegate, predsjednicu Federacije Bosne i Hercegovine Borjanu Krišto, premijera Federacije Nedžada Brankovića, zamjenika premijera Vjekoslava Bevandu, ministre u Vladi Federacije Bosne i Hercegovine, goste, predstavnike Međunarodne zajednice i međunarodnih organizacija, predstavnike udruženja, kao i predstavnike akreditiranih medijskih kuća koji prate rad sjednice.

Izostanak sa sjednice opravdao je Jasenko Tufekčić.

Na osnovu evidencije Stručne službe, predsjedavajući je konstatovao da sjednici prisustvuje 48 delegata, što čini većinu, te Dom naroda može raditi i punovažno odlučivati.

Predsjedavajući je obavijestio delegate da je Vlada Federacije dostavila sljedeće prijedloge zakona sa prijedlogom da se razmatraju po hitnom postupku i to:

- Prijedlog Izmjena Budžeta Federacije Bosne i Hercegovine za 2008. godinu,
- Prijedlog Zakona o izmjenama i dopunama Zakona o izvršavanju Budžeta Federacije Bosne i Hercegovine za 2008. godinu,
- Prijedlog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine,
- Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica.

Predsjednik Kluba delegata hrvatskog naroda Josip Perić je, u ime Kluba, predložio da se Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica razmatra kao 1. tačka a da se kao 2. tačka dnevnog reda uvrsti Prijedlog Zakona o izmjenama i dopunama Zakona o doprinosima, čiji je predlagač Klub delegata hrvatskog naroda u Domu naroda Parlamenta Federacije Bosne i Hercegovine.

Alija Begović je, u ime Kluba delegata bošnjačkog naroda, predložio da se 3. tačka dnevnog reda razmatra kao 1. tačka, što delegati nisu prihvatili.

Premijer Nedžad Branković prihvatio je prijedlog da se Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica razmatra kao 1. tačka, dok bi se Prijedlog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine, Prijedlog Izmjena Budžeta Federacije Bosne i Hercegovine za 2008. godinu i Prijedlog Zakona o izmjenama i dopunama Zakona o izvršavanju Budžeta Federacije Bosne i Hercegovine za 2008. godinu razmatrali kao tač. 2., 3. i 4. U vezi sa Prijedlogom Zakona o izmjenama i dopunama Zakona o doprinosima premijer je istakao da Vlada Federacije nije zauzela stav o ovom Prijedlogu Zakona.

Delegati su prihvatili prijedlog Alije Begovića da se o svim tačkama dnevnog reda vodi zajednička rasprava, a da se izjašnjavanje obavi pojedinačno.

Nakon toga Dom naroda se izjašnjavao o hitnom postupku, predloženom od Vlade Federacije za razmatranje prijedloga zakona.

Predsjedavajući je konstatovao sljedeće:

- sa 35 glasova za, uz 11 glasova protiv i uz jedan uzdržani glas, Dom naroda Parlamenta Federacije prihvatio je da se Prijedlog Izmjena Budžeta Federacije Bosne i Hercegovine razmatra po hitnom postupku;

- sa 34 glasa za, uz 12 glasova protiv i uz jedan uzdržani glas, Dom naroda Parlamenta Federacije prihvatio je da se Prijedlog Zakona o izmjenama i dopunama Zakona o izvršavanju Budžeta Federacije Bosne i Hercegovine za 2008. godinu razmatra po hitnom postupku;

- sa 32 glasa za, uz 13 glasova protiv i uz dva uzdržana glasa, Dom naroda Parlamenta Federacije prihvatio je da se Prijedlog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine razmatra po hitnom postupku;

- sa 34 glasa za, uz 11 glasova protiv i uz jedan uzdržani glas, Dom naroda Parlamenta Federacije prihvatio je da se se Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica razmatra po hitnom postupku.

S obzirom na to da je premijer Nedžad Branković, u ime Vlade Federacije, izjavio da je Prijedlog Zakona o izmjenama i dopunama Zakona o doprinosima neprihvatljiv, Josip Perić je, u ime Kluba delegata hrvatskog naroda, zatražio pauzu kako bi se Klub dogovorio o načinu izjašnjavanja o zakonima u predloženom dnevnom redu.

Nakon pauze, Josip Perić je izjavio da se 2/3 delegata iz reda hrvatskog naroda izjasnilo da smatra kako Prijedlog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine spada u pitanja od vitalnog interesa za hrvatski narod i zatražilo da se o Prijedlogu Zakona odlučuje po proceduri predviđenoj za donošenje zakona o vitalnom nacionalnom interesu.

Nakon toga predsjedavajući je konstatovao da je Dom naroda Parlamenta Federacije, sa 33 glasa za, uz osam glasova protiv i uz pet uzdržanih glasova, usvojio sljedeći:

DNEVNI RED

1. Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica – hitni postupak,
2. Prijedlog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine – hitni postupak (razmatranje po proceduri za vitalni nacionalni interes),
3. Prijedlog Izmjena Budžeta Federacije Bosne i Hercegovine za 2008. godinu – hitni postupak,
4. Prijedlog Zakona o izmjenama i dopunama Zakona o izvršavanju Budžeta Federacije Bosne i Hercegovine za 2008. godinu – hitni postupak.

Predsjedavajući je podsjetio delegate da će se o ovim tačkama voditi zajednička rasprava, a izjašnjavanje obaviti pojedinačno.

Prijedloge ovih zakona utvrdila je Vlada Federacije.

Predstavnički dom je na 14. vanrednoj sjednici, održanoj 22.04.2008. godine, usvojio Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica, u tekstu kako ga je predložila Vlada Federacije, uz zaključke.

Također, na istoj sjednici Predstavnički dom je usvojio Prijedlog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine, uz jedan amandman koji je Vlada Federacije prihvatila i

jedan amandman Vlade Federacije koji su postali sastavni dio Prijedloga Zakona. Amandmani se odnose na dodavanje novih čl. 2. i 3. Premijer je izjavio da je u Prijedlogu Zakona dostavljenom na hrvatskom i srpskom jeziku u članu 1. Prijedloga Zakona pod tačkom e) - Direkcija cesta napravljena greška i da umjesto procenta "3,2%" treba da piše "3,9%".

Predstavnički dom je na ovoj sjednici, također, usvojio Prijedlog Izmjena Budžeta Federacije Bosne i Hercegovine za 2008. godinu, Prijedlog Zakona o izmjenama i dopunama Zakona o izvršavanju Budžeta Federacije Bosne i Hercegovine za 2008. godinu u tekstu kako ih je predložila Vlada Federacije Bosne i Hercegovine.

Prijedloge ovih zakona razmatrala su nadležna radna tijela i dostavila svoje izvještaje.

Prijedloge ovih zakona obrazložio je premijer Nedžad Branković.

U pretresu su učestvovali: Svetozar Pudarić, Josip Perić, Besim Imamović, Tomo Vidović, Alija Begović, Bojan Bošnjak, Radoje Vidović, Anđelko Mikulić, Ramo Isak, Lidija Bradara, Muhamed Osmić, Asim Mekić, Pero Jukić i premijer Nedžad Branković.

S obzirom na to da je Klub delegata hrvatskog naroda podnio amandman na član 1. Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica, predsjedavajući ga je stavio na glasanje i konstatovao da amandman nije dobio potrebnu većinu glasova, jer je za njega glasalo 14 delegata.

Također se glasalo o Zaključku koji je predložio Bojan Bošnjak.

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 31 glasom za i uz 13 uzdržanih glasova, usvojio sljedeći:

ZAKLJUČAK

Obavezuje se Dom naroda Parlamenta Federacije Bosne i Hercegovine da odmah uputi zahtjev Parlamentarnoj skupštini Bosne i Hercegovine za donošenje Zakona o zaštiti domaće proizvodnje unutar Sporazuma CEFTA o kojem se vodi rasprava u Predstavničkom domu Parlamentarne skupštine.

Usvajanjem predloženog Zakona smanjio bi se trgovački deficit, povećali prihodi u budžetu i, na taj način, postigli višestruki pozitivni efekti, odnosno zaštitila bi se domaća proizvodnja, osiguralo dovoljno sredstava za braniteljsku populaciju i ostavilo kantonima potrebna finansijska sredstva za razvoj i podsticaj u poljoprivredi.

Potom se prešlo na glasanje o prijedlozima zakona.

1. Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 34 glasa za, uz 11 glasova protiv i uz tri uzdržana glasa, usvojio Prijedlog Zakona o izmjenama i dopunama Zakona o pravima demobiliziranih branitelja i članova njihovih porodica.

2. Prijedlog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine

Predsjedavajući je podsjetio delegate da će se izjašnjavanje u vezi sa ovim Zakonom obaviti po proceduri predviđenoj za razmatranje zakona za koje je pokrenut vitalni nacionalni interes.

Prvo su glasali delegati iz reda bošnjačkog naroda.

Za Prijedlog Zakona glasalo je 16 delegata.

Potom su glasali delegati iz reda hrvatskog naroda.

Prijedlog Zakona nije dobio potrebnu većinu glasova, jer je za glasao jedan delegat, a 12 je bilo protiv.

Nakon toga glasali su delegati iz reda srpskog naroda.

Za Prijedlog Zakona glasalo je 13 delegata, jedan je bio protiv i jedan uzdržan.

Zatim je Dom naroda o Prijedlogu Zakona glasao u cjelini.

Predsjedavajući je konstatovao da je Dom naroda Parlamenta Federacije većinom glasova usvojio Prijedlog Zakona o izmjenama i dopunama Zakona o pripadnosti javnih prihoda u Federaciji Bosne i Hercegovine, jer su za njega glasala 33 delegata, a 14 je bilo protiv.

S obzirom na to da je Prijedlog Zakona razmatran po proceduri predviđenoj za razmatranje zakona za koje je pokrenut vitalni nacionalni interes, u skladu sa članom 117. tačka 6. Poslovnika o radu Doma naroda Parlamenta Federacije Bosne i Hercegovine, Zakon će se **uputiti Zajedničkoj komisiji**, koju čine predstavnici Predstavničkog doma i Doma naroda, a koja će pokušati usaglasiti Prijedlog Zakona.

3. Prijedlog Izmjena Budžeta Federacije Bosne i Hercegovine za 2008. godinu

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 34 glasa za, uz 12 glasova protiv i uz dva uzdržana glasa, usvojio Prijedlog Izmjena Budžeta Federacije Bosne i Hercegovine za 2008. godinu.

4. Prijedlog Zakona o izmjenama i dopunama Zakona o izvršavanju Budžeta Federacije Bosne i Hercegovine za 2008. godinu

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 34 glasa za, uz 11 glasova protiv i uz četiri uzdržana glasa, usvojio Prijedlog Zakona o izmjenama i dopunama Zakona o izvršavanju Budžeta Federacije Bosne i Hercegovine za 2008. godinu.

* * *

Sjednica je završena u 16.40.

Transkript sa sjednice čini sastavni dio Zapisnika.

SEKRETAR

Izmir Hadžić

PREDSJEDAVALAČI

Stjepan Krešić